

DISSERTATIO  
INAUGURALIS  
DE  
MORBIS CUTANEIS.

QUAM,  
ANNUENTE SUMMO NUMINE,  
Ex Auctoritate Reverendi admodum Viri,  
GULIELMI ROBERTSON, SS.T.P.  
ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,  
Et nobilissimæ FACULTATIS MEDICÆ decreto;  
PRO GRADU DOCTORIS,  
SUMMISQUE IN MEDICINA HONORIBUS ET PRIVILEGIIS  
RITE ET LEGITIME CONSEQUENDIS;

Eruditorum examini subjicit

JOSEPHUS DIMSDALE,  
BRITANNUS.

Soc. Med. Edin. Sod.

Ad diem 12. Junii, hora locoque solitis.

EDINBURGI:  
Apud BALFOUR et SMELLIE,  
Academiae Typographos.

M;DCC;LXXIII.



Viro amplissimo

G U L I E L M O C U L L E N ;

Cui in medicina, eruditorum,

In virtute, communis omnium consensus

Primas detulit ;

Quem juvenilis aetas

Literis humanioribus florentem,

Provectior summos academiae honores

Ingenio et moribus ornantem, ostendit ;

Quem, porro,

Totum in philosophia,

Enixe quoque rebus academicis, bonoque publico,


Consulentem,

Laeti omnes hodie intuemur :

Hoc, qualecunque sit, tentamen

Sacratum voluit

A U C T O R.



Digitized by the Internet Archive  
in 2019 with funding from  
Wellcome Library

<https://archive.org/details/b3078976x>

D E

# MORBIS CUTANEIS QUÆDAM.

**Q**UONIAM cutis affectiones adeo numerosae sunt, quoniam inter sese tam magnopere discrepant, et sanatu difficillimae saepius evadunt, cur medicorum attentionem potissimum sibi vindicent, summaque cura sint indagandae, haud opus est ut pluribus dicam. Pathologorum autem conamina in iisdem investigandis nondum feliciter cessisse fatendum est; quapropter minus accuratis insigniuntur notis, nec idcirco adamussim a se invicem distinguuntur. Neque, mehercle, peculiaris eorum indoles causaeque proxima huc usque penitus intellectae  
A fuerunt :



## 2 DE MORBIS CUTANEIS QUÆDAM.

fuerunt: Hinc neque regularis, neque uniformis, nec certis innixa est principiis, horum morborum medendi ratio.

Quamvis defectus tot tantosque nos posse supplere minime sperandum, attamen laude non indignum fore ejusmodi molimen existimamus; itaque, observationes quasdam, quae huic proposito accommodatae nobis visae fuerunt, in medium proferre, in animum induximus.

Primo, errores quosdam, in quos circa hanc rem inciderunt medici, indigitare; secundo, animadversiones nonnullas, quae ad magis accuratam morborum cutaneorum distinctionem conducere possint, proferre, conabimur.

Imprimis, abs re non erit adnotare, locum non deesse suspicandi partem affectam<sup>plerumque</sup> acri quadam infestari materie, quae vel tumori, vel ulceri, vel exfudationi, ex quibus morbus conflatur, ortum praebet. Aliquantulum tamen incerta est hujusce acrimoniae origo, licet solennis apud plerosque medicos obtinuerit opinio,

opinio, hanc acrimoniam primum in sanguine exstitisse, et ex illo ad partem affectam devectam fuisse. Hanc tamen hypothefin caduco sæpissime fundamento inniti arbitramur; licet enim in singulari quadam parte sese prodere videatur acrimonia, non tamen exinde sequi eam revera existere, vel prius totam sanguinis massam infecisse, ostendere tentabimus.

I. Quoniam secreta fluida in ipsis organis secretoriis quam sæpissime formari novimus.

Quod plura ex illis spectat, ne minima quidem affertur probatio, ea in sanguine formaliter praeexstitisse; igitur, in eo ipso per quod transeunt organo, et in cujus excretoriis tantummodo apparent, formantur necesse est. Illud abunde exinde confirmatur, quod varias fluidorum secretorum mutationes, a mutatione in organi secretorii conditione, ex irritationibus, vel relaxationis causis illi admotis, dum fluidorum in genere vel generalis circulationis status nequaquam mutatus fuisse videtur, pendere  
ani-

#### 4 DE MORBIS CUTANEIS QUÆDAM.

animadvertimus : Et, ex altera parte, sæpe notabiles in generali circulationis statu mutationes, dum fluida secreta eadem prorsus remanent, deprehendimus. Hujus exemplum fit mucus, cujus tanta copia in systemate fecernitur. Nullatenus probatur, hujusmodi fluidum sub hac larva in massa sanguinea sese abscondere : E contra, aperte demonstratur, mucum in folliculis sibi propriis generari ; et, ex mutationibus in horumce folliculorum conditione, varias induere formas, percipimus ; ut cernere est in catarrho, coryza, gonorrhoea, &c.

Peculiare fluidum, particulari vasorum, per quae fluidorum massa transeat, constitutione, formari posse, ex puris generatione, certo concludimus. Quis hoc in sanguine semper praesens esse contendat ? In qualibet autem corporis parte cui vulnus aliquod infertur, vel quae inflammatur, gigni posse, nemo inficias ibit.

Acris igitur in quadam corporis parte materiei praesentia, eandem sanguini acrimoniam inesse, non testatur.



II. Quod ad cutem ipsam speciatim attinet, <sup>saltem phenomena quæ pro effectibus acrimoniæ sæpe habentur, in cute</sup> acrimoniam, ~~in illa~~ ex quibusdam causis generari, per quas acrimoniam in sanguine gigni suspicari non licet, compertum est.

Ita non defunt exempla eorum in quibus Gutta Rosea proruperit, propter id unum quod aqua pro potu communi usi fuerint, quique, epotata cerevisia, ab illa immunes evaserint.

Idem colligere possumus ex plurimis materiei speciebus, quae, simulac in ventriculum accipiuntur, efflorescentias in cute pariunt; quae tamen, quamprimum eadem materiae ex ventriculo ejiciuntur, subito evanescunt. Huc pertinent variorum piscium effectus, velut salmonis, halecis, astaci, &c. Sed nulli sunt tam notatu digni, quam qui a V. Swiet. referuntur ex mytulis et cancro-  
rum oculis fuisse producti. Hic ipsissima auctoris verba, quippe quae sententiam nostram mirum in modum confirment ac elucident, exscribere liceat.

‘ Praeterea (inquit), docet observata, quandoque illud, quod pruritus et exanthemata  
‘ facit,

## 6 DE MORBIS CUTANEIS QUÆDAM.

facit, haerere in ventriculo, et circa præcordia; atque, hoc excusso, statim ista evanescere. Dum, mala fortuna, venenatum mytulum quis devoravit, summa sequitur, nunc citius, nunc serius, anxietas; et paulo post, cum pruritu summo tota fere corporis cutis exanthematibus obsidetur; dato vitriolo albo vel simili alio emetico, quod illico vomitum facit, dum deglutitum est, si excutiantur contenta ventriculo, evanescunt brevi, una cum anxietate, hæ efflorescentiae: Neque credibile videtur, venenatam illam acrimoniam, sanguini mistam, ad cutim delatam fuisse, cum post vomitum illico cessent omnia mala. Novi hominem cui illico eadem symptomata contingunt, si lapides cancrorum sumpserit, cessantia pariter dum vomitu hos rejecerit.

Hinc observamus, morbos cutaneos a materia praesente non semper deducendos, sed a mutatione in ipsiusmet sanguinis distributione, prout majori minorive impetu ad vasa

sa



sa cutis determinatur, prorsus pendere posse. Hujusmodi mutationes, praesertim quod cutem spectat, ad varias causas, ac, inter alias, ad animi pathemata, referri queant, quae effusionibus vel stagnationibus locum praebent, ex quibus vel morbus ex toto oritur, vel acrimonia illiusque subsequentes effectus profecto nasci possunt.

III. Si effectum mutationis in fluidorum determinatione attente perpendamus, facile occurremus argumento, quod vulgo ad opinionem acrimoniae quosdam cutis morbos generantis sustentandam allatum fuit; quo probare contendunt illius opinionis fautores, hanc genuinam sanguinis esse prolem, eandemque ad natale solum resorptione reverti. Petitur ex interrupta fonticulorum aliorumque veterum ulcerum evacuatione, atque ex repulsionis cutanearum eruptionum effectibus. Hosce effectus a retentione acrimoniae prius e sanguine expulsaе, et ejusdem ad alias corporis partes translatione, edi complures putant. Hanc autem opinionem, in plerisque casibus, mere hypotheticam esse contendimus;

## 8 DE MORBIS CUTANEIS QUÆDAM.

tendimus ; sæpiſſime enim ne minima quidem ex parte aſſe dici poteſt quaelibet ſanguinis acrimonia. In fonticulis nihil certe præſentem arguit dari acrimoniam, præter eam quæ quotidie ex partis conſtitutione generatur, ſtimuloque ad eam applicato producitur : Ablato autem ſtimulo, parteque ad priſtinum ſanitatis ſtatum revocata, ſiſtitur acris materiae formatio ; ac proinde, nullus remanet contendendi locus, hanc vel retentam vel tranſlatam fuiſſe. Veterum, igitur, fonticulorum, &c. exſiccatorum effectus ad mutationem in fluidorum determinatione prorſus referendos eſſe, negari non poteſt.

Effectus, qui ex hac diſtributionis mutatione proficiſci queunt, ex ſuppreſſione menſtrui in foeminis fluxus præſertim intelligimus. Ibi dici nequit peculiare fluidum effuſum fuiſſe : Atqui tamen illius retentio innumera in aliis corporis partibus vitia gignit, quæ, ut plurimum, a commutata fluidorum diſtributione evidenter deducenda ſunt.

Quæ-



## DE MORBIS CUTANEIS QUÆDAM. 9

Quatenus quidam cutanei affectus ab hac fluidorum distributione, eorumque in vasa cutis impetu adaucto, pendere possint, forsan exinde eruendum, quod in temperamentis sanguineis, ad haemorrhagias proclivibus, Gutta Rosea per sæpe prorumpat; nec raro observamus nonnullos utriusque sexus, acriores tempore, id est, circa illam aetatem qua maximo plethorae gradu laborant, eruptionibus cutaneis obnoxios esse, quae tamen post paucos annos sponte sua decedunt.

Ex eis quae supra dicta sunt, satis liquet, cutaneos affectus haudquaquam vitiata sanguinis mole obtinere posse; ac revera de facto constat, complures hujusmodi eruptiones hoc modo se manifestare. Hinc, inquam, aperte patet, licet per plures annos persisterint cutanei affectus, alia tamen systematis munia intacta ac illaesa servata fuisse. Nec, utcunque vel sanguinem ipsum, vel variarum excretionum conditionem, introspeciamus, fluidorum statum vel minimum a sana sua nativae conditione aberrasse, percipere possumus.

Denique, morbos cutis a communi sanguinis crasi, vel a generali systematis affectu, rite deduci non posse, illi nulla dubitationis ansa relinquitur, quicumque animadverterit, hosce cutis affectus sæpe non internis remediis, sed partis ipsius mutatione, et hac quidem sola, sanari. Sic nulla alia arte, præterquam extirpandis capillorum bulbis, Capitis Tineae medemur: Et conjectura non improbabilis est, Lepram Ichthyosin, quae per sæpe cum Tinea conjuncta est, idcirco sanatu difficilem esse, quod eadem medendi ratio, in affectu tam late diffuso, commode adhiberi nequeat.

Ulcera sæpe nihil aliud sunt quam cutanei affectus, quos, sanie ex illis profluente, ad sanguinis vitium ultro referimus. Sed nos perperam hic ratiocinari ex eo evincitur, quod ulcus, admota parva hydrargyri, cupri, vel aliorum medicamentorum topicorum, quantitate, absque ullis internis remediis, conglutinetur. Praeparata igitur ex hisce substantiis, five ad eorum indolem, five ad parvam qua ea exhibeamus quantitatem,

## DE MORBIS CUTANEIS QUÆDAM. II

tatem, aut ad eorundem applicationis modum, respiciamus, ea generalem sanguinis crasin immutasse suspicari non poterimus; ac ideo peractam fuisse sanationem solius partis mutatione: Mutationem autem in eo consistere, quod partis ipsius, a qua pendebat morbus, mutata fuerit conditio. Aliquando totus morbus dependenti partis positurae, et quidem nulli aliae causae, ortum debet; saltem remediis difficulter cedit. Hinc ulcerum cruris exempla existant, quae, cum omnibus remediis restiterint, horizontali crurum situ solo tandem sanata fuerunt.

Ex eis omnibus concludi potest, <sup>vel</sup> acris <sup>in cute</sup> materiei praesentiam, <sup>ibi. phenomena quae pro effectibus</sup> vel ~~eius effectus~~ quibus <sup>acrimoniae vulgo habentur, nequaquam</sup> ~~cutis infestari ferunt,~~ non semper acrem in sanguine materiam existere, atque ex illo ad cutem devectam fuisse, arguere: Et quo fortius apud medicos haec invaluerit opinio, eo saepius a vero ac genuino plurimorum morborum ingenio, illorumque proximis causis investigandis, illos deterruit: Nec sine probabilitatis specie conjicere fas est, eos exinde <sup>impeditos</sup> fuisse quo minus idoneam, ac hisce morbis



## 12 DE MORBIS CUTANEIS QUÆDAM.

morbis maxime accommodatam, medendi rationem compererint.

Sed et simul a nimis generalibus cavendum est conclusionibus : Ideoque, licet cutanei morbi sæpiissime ad sanguinis acrimoniam, tanquam ad illorum causam, perperam referantur ; attamen nulla in nobis mora est quin acrimoniam, quibusdam in casibus, in sanguine obtinere, ac morbos cutis manifesto gignere, fateamur. Ita se res habent in scorbuto, in syphilitide, in scrophula, in exanthematis contagiosis, in venenis, per vulnera inflictæ, cruori immixtis, ac tandem in cancro, aliisque affectibus, absorptionis ope, totum systema vitiantibus.

Sed, quanquam nullus sit dubitandi locus, quin varii generis acrimonia in sanguinem irrepere queat, et ad cutem devecta illam foedare possit ; attamen observare oportet, vix unquam tam perspectam planeque cognitam esse acrimoniae illius indolem, ut particularem ex hac notitia indicationem penes nos sit deducere. Hic igitur generalem tantum indicationem sequi fas est, cui diac-

tetica



tetica praecepta et evacuationes adauctae, diuque continuatae, totam sanguinis molem immutantes, respondent.

Haud raro deprehendimus oeconomiam animalem quibusdam substantiis, quae casu in circulationis cursum sese insinuarint, cito ejiciendis parem omnino esse. In variis contagiosis exanthematibus id obtinere novimus, in quibus, ad acrimoniae ingenium, quod eos lateat, nullatenus attendunt medici: Sed animadvertentes quonam modo ab illis extraneis corporibus sese natura liberet, ad eundem perpendendum animos suos ex toto adjiciunt.

Plerumque accidit, ut nec acris hujus materiae indoles, nec illius expellendae ratio, innotescat: Ac proinde ista parum curant medici, et solummodo fatagunt, ut ejus effectibus, quamdiu in corpore maneat, obviam eant. Ita in rabie canina sese gerunt. Itaque in universum, totius sanguinis acrimoniam pro cutaneorum morborum causa habere, parum nobis in praxi prodesse, luculenter patet.

## 14 DE MORBIS CUTANEIS QUÆDAM.

Enucleata generali cutaneorum morborum pathologia, confutataque, fere omnibus acceptissima, generalis acrimoniae doctrina ; nunc superest, ut de discrimine quod cutaneos affectus interfit, et five ab hac five ab illa causa oriundi sint, inquiremus.

Casus affectuum cutaneorum, a praesentia acrimoniae magis generalis vel topicae oriundorum, varios, inter sese apertius distinxerimus, si fontes unde profluant diversos prius rite consideraverimus. Imprimis, vitia cutanea per varios fontes unde materia acris efferatur, a sese invicem fecerni possunt.

Hi autem fontes sunt **NATURALES** vel **PRAETERNATURALES**.

Quod ad priores attinet, examini subjicienda sunt,

- I. Solita perspirationis organa.
- II. Vasa in bulbis pilorum excretoria.
- III. Ductus sebacearum glandularum excretorii.

Quan-

Quamquam hi fontes utrique species cutaneorum affectuum, inter sese distinctas, in genere dare queant ; attamen fatendum est, eos aliquando ad unum eundemque effectum producendum evidenter concurrere posse : Morbos enim, ex illis fontibus separatim ortos, inter sese non raro commisceri, revera notamus.

Nunc proprie de singulis agendum.

Materies perspirabilis subter cuticulam, vaporis simillima, diffunditur, atque sub eadem forma ex epidermidis poris exhalat. Nonnunquam autem sub liquidi forma se manifestat, vel, vaporis instar, tam celeriter effunditur, ut, antequam exhalari queat, in fluidum condensetur ; quod ubi fit, Sudor nuncupatur.

De hoc apud physiologos jamdudum convenit. A nostro igitur proposito alienum foret, physiologicam hanc quaestionem aggredi ; quum hoc, sive cuticulam pro organica vel inorganica haberemus, ad ratiocinia anatomicorum, de formatione ejusdem, obscuriora, nos plane conduceret. Satis erit igitur, si in praesens  
adno-



## 16 DE MORBIS CUTANEIS QUÆDAM.

adnotemus, ex microscopicis Lewenhoeckii observationibus constare, cuticulae pororum, perspirationi vel sudori exitum praebentium, longe majorem esse numerum, quam ut extremis vasis, quantumvis exigua esse ponantur, respondere valeant. Unde sequeretur, haec fluida, per epidermidem, quasi per cribrum, transire; minime vero per vasa cutis verae ad cuticulam pertingentia, quorum aperta oscula secretionem supra epidermidis superficiem perficerent. Denique, analogia ex perspiratione testarum ovi deducta, huic opinioni non parum favet.

Cum sudorem tum perspirationem acrimoniam quandam in semetipsis nunquam non continere verisimile est: Illius autem acrimoniae indolem in apricum proferre, hic labor, hoc opus. Hoc unum certo novimus, acrimoniam, eamque ammoniaci generis salinam, in systemate quolibet, integerrima etiam sanitate gaudente, sponte natura gigni; quod medicorum experientia clare probat. Haec materies salina cum fluidissimis corporis excretionibus, tanquam menstruis sibi accom-

com-



commodatis, sese confociat : Et idcirco magna illius copia per organa, ad urinam fecerendam, vel perspirationem et sudorem foras eliminanda, destinata, viam sibi patefacit.

Praeterea, cum fudor et perspiratio fluida sint excrementitia, acrimonias alias, quae prius in sanguine exstiterint, quarumque natura nos huc usque latuerit, una cum illis e corpore foras expelli, verisimillimum esse videtur.

Contagia autem genere varia, exanthematibus ortum praebentia, immo, contagia quaedam et miasmata febres gignentia, seu morbos exfufcitant, seu affectus morbificos non producunt, sed corpore illaeso exeunt, quod quidem nonnunquam contingere videtur, per haec organa praecipue transmittantur necesse est. Sed de his fufius infra.

Exhalationem perspirationis, vel effusionem sudoris, materiam in extremis cutis vasis, vel in illius superficie, subter cuticulam, acrem saepe deponere posse, vel eandem in externa cuticulae superficie coalescere, ex supra dictis fatis apparet.

## 18 DE MORBIS CUTANEIS QUÆDAM.

Ubicunque sudoris formam induit effusio, oportet ut simul acrior sit, quippe quae majorem salinae materiae copiam contineat, et facilius, ob copiam et celerem ejus effusionem, subter cuticulam detineatur, ibique suae acrimoniae effectus commonstret.

Huic causae prorsus deberi videtur, ut quilibet, praedicta attente perpendens, fatebitur, quod regionum calidarum incolas, qui tam largo sudoris profluvio assueti sint, tam saepe adoriatur morbus Effera vocatus, pruritusque, Efferae perpetuus fere pedissequus.

Quo magis ad ista consideranda animum adjungemus, eo facilius rationem cutaneorum morborum, regionum calidarum incolas invadentium, reddere poterimus.

Iisdem causis effectum saepius observatum, Miliarem, nempe, Eruptionem, sudorem in plurimis concomitari, lubenter assignarem. Nec improbabile videtur, hanc eruptionem, quam apud medicos plerosque sub titulo Morbi Idiopathici, a contagio specifico orientis, descriptam invenimus, nihil aliud praeter regiminis calidi sudorisque effectum esse. Ac  
reipsa

re ipsa quidem in illis partibus fere solis erumpit quae vestibis obducuntur, ac ab externae atmosphaerae injuriis proteguntur. Sic crebrius suos effectus edit sudoris acrimonia, miliarem eruptionem, in vesiculas admodum exiguas celerrime abeuntem, producendo : Aliquando vero phlyctænas numerosiores, vel vesiculas magis prominentes, emergere facit; cujus cutanei effectus in Zona vel Zosterio exemplum cernere est. Nobismet phlyctænas videre accidit in casu rheumatismi sudore stipati, ubi hujusmodi eruptio, in eis tantummodo partibus quae panno laneo sint opertae, conspiciendam, nobis non parum mirantibus, sese praebeuit.

Cum acres materiae cuti admotae inflammationem ibi pariunt, vel exhalatio, vel effusio, vel exsudatio quaedam, deprehenditur, quae quidem per solita perspirationis vel sudoris organa prorumpere dici potest; caeterum, simul per adauctam vasorum illam fundentium actionem, mutationem aliquam subiisse videtur. Hinc non sine probabilitatis specie concludere fas est, hanc tanta crassitie esse praeditam, ut exinde non amplius per poros cuticulae transire



transire queat; quapropter illam subter accumulatur, amplasque excitat vesiculas tenui fluido repletas; et hae quidem vesiculae a variis acribus materiis, corporis superficiei admotis, quae primo inflammationem, deinde vesiculas, gignunt, procreantur.

Ad hujusmodi acrimoniam, quae nonnunquam causis externis, per saepe autem internis, debetur, Erysipelas, quod quidem in vesiculas abire, et per illas terminari, omnibus notum est, referendum esse putamus.

Utrum aliarum vesicularum exempla, simili modo, acri materiae, cutis superficiem infestanti, tribui debeant, non ita clare constat. Utrum, verbi gratia, in Pemphigo Castrensi, et Pemphigo Helvetico Sauvagesii, primum ad cutis superficiem deferatur materies, vel in vasis ipsis suos exerceat effectus, nequaquam evincit manca et imperfecta horum morborum historia.

In Pemphigī specie, quae in hac regione occurrit, haud maligne morbus grassatur, parva admodum febre stipatur; et, quanquam non exiguae sint vesiculae, ne unum quidem inflammationis signum apparet.

Num



Num unquam cuticulæ ipsius, perspirationem difficilius emittentis, vitio adscribi vesiculæ possunt?

Puero decem annos nato, a primis incubulis, plurimæ corporis partes, manus potissimum et pedes, vesiculis, variae magnitudinis, quarum minimæ molem grani sinapis, maximæ nucis avellanae, adaequabant, fere semper obtegebantur. Absque praeceunte inflammatione vesiculæ eruperunt, tenui sero replebantur, et paucae ex minoribus tantum purulentam materiam continere visae sunt. Aliquot ab eruptione diebus elapsis, cuticula disrupta, materiem effuderunt, quae nullam omnino acrimoniae speciem prae se se ferebat, nec ullam ulcerationem excitabat. Exhalata vel effusa materia, nova epidermis protinus restituta est. Puer illibata alioquin sanitate fruebatur, quamdiu perstitit eruptio; itaque vix ulla causa est cur acrimoniam vel in parte affecta generari, vel in sanguine invalescere, suspicemur. Hisce igitur supra propositis inducti, eruptionem cuticulæ vitio potius referendam esse censemus.

Ut

Ut effusiones ex inflammatione oriundæ vel tenue serum haud facile in pus convertendum, vel materiam certam, quæ post quandam stagnationem in abscessu, aut exhalationem in ulcere, quam promptissime in pus abeat, referunt; sic idem discrimen in inflammationibus in cutis superficie animadvertitur. Ita ex alio irritamento parti cuilibet admoto oritur vesicula sero limpido repleta; dum aliud irritamenti genus pustulam, vel vesiculam pure repletam, producit.

In Variolis, subter cuticulam deponitur materies, movetur inflammatio, effusione feri stipata, unde conflantur vesiculæ, quarum materies in pus immutatur.

Id contingit, quandocunque, in insitione variolarum, materies, qua lanceolæ apex imbutus est, cuticulæ inferitur: Et cum ex prima hac vesicula virus sanguini per absorptionem admistum fuit, illud ad alias cutis partes, per solita perspirationis organa, advehi putamus; ac simili modo pustulas producere videtur, ejusdem fere generis, cujus prior vesicula, ab insitione orta, fuerit.

Effu-

Effusionem infra cuticulam obtinere, ac in sacculis hoc in casu contineri, satis evincit praxis Indorum, apud quos mos est pustulas aperire, unde data porta ruit materies; leve vulnus autem cito conglutinatur, ac extemplo rursus replentur sacculi: Et, licet duorum triumve dierum spatio ad sextam vel septimam vicem repetatur incisio, unaquaque vice ejusdem prorsus indolis materies effunditur.

Haec variolarum consideratio nos docet, effusionem, si mitis sit, et cito in pus inspissetur, pustulis, quae brevi exsiccentur, nullaque cutem cicatrice deformant, excipi. Sin autem cicatrices adsint, materiem effusam magis acrem fuisse non immerito suspicamur: Et hoc praecipuum sistit discretas inter et confluentes variolas discrimen. Hic tamen, effectus, a variolarum veneno generale systema afficiente oriundos, silentio praeteriisse monendum est.

Diligenter perspecta hac variarum materierum indole, cur materies in vesiculis consuetis, in eis, puta, quae ab epispasticis excitantur, diversa



## 24 DE MORBIS CUTANEIS QUÆDAM.

diversa reperiatur, intelligimus. Hinc, inquam, discimus, cur, expulsa materie, nuda omnino relinquatur cutis superficies, dum aliis in casibus crassius est hoc fluidum, namque gelatinosae materiae, cutis superficiei firmiter adhaerescens, copiam ostendit.

Hinc operae pretium foret inquirere, Utrum cutis superficies, postquam illi inflammatio supervenerit, eandem materiae speciem, quae in superficie internorum viscerum quae corripuerit inflammatio, reperitur, exsudare queat; ac proinde, utrum haec materies, absque erosionem, ex ipsismet perspirationis organis profluat?

Rem ita se habere in inflammatione glandis penis, cujus tenuis admodum est cuticula, satis evidenter patet: Ac quidem in externa tumorum inflammatorum superficie, cuticula, applicationum emollientium usu, desquamata, idem prorsus deprehenditur.

Si igitur hujuscemodi fluidum cutis exsudare queat, satis verisimile videbitur, materiam in perpetuis epispasticis, eadem ratione

ac in vesicula prima, absque erosione effundi.

II. In pilorum bulbis alterum fontem exsudationum vel effusionum in corporis superficiem habemus.

Ab illis exsudationem oriri, quae partim capillorum cursum sequitur, partim super cuticulae superficiem diffunditur, neminem latet. Nec incredibile est, hanc, aeque ac alias corporis secretiones, saepe morbis esse obnoxiam. Quam hypothesein ut fulciamus, pauca exempla, in quibus id evidenter obtinere videtur, referemus. Hujuscemodi unum nobis, me judice, suppeditat Trichoma vel Plica Polonica: Cum vero nostrismet oculis morbum hunc conspicere non datum sit, nihil certum de illo proferre possumus. Tineam capitis, a morbosa in capillorum bulbis excretionem facta proficisci, confidentius affirmare licet; nam, ut supra observavimus, capillitium praecipue infestat, et, evulsis tantummodo capillis, sicque penitus diruta vel immutata bulborum conditione, sanatur. Sub crustarum admodum crassarum forma sese prodit

Tinea; sed in aliis corporis partibus, ubi exiliores pili, eorumque bulbi crasso humori effundendo minus sunt idonei, tenuis ac aliquantulum refulgens squama, circa partes quibus pili sint inserti, efformatur. Hic cutis affectus Lepra Ichthyosis apud Sauvagesium audit, ac admodum frequenter tineae capitis adjungitur.

Prava hujusce exsudationis conditio faepissime etiam in Scorbuto observatur, cujus diversicolas maculas pilos fere semper circumdare Hulmius affirmavit.

III. Tertium fontem exsudationis in cutis superficiem, in glandulis sebaceis, unde nulli exoriantur pili, invenimus.

Varias cutis partes, in quibus hae glandulae collocantur, anatomicorum est adnotare. Quoniam autem de illorum existentia apud nullos controversia movetur, dubitari non potest quin depravatam aliquando materiem exsudare possint. Hujusmodi exsudatio, quibusdam in casibus, magnas mutationes in corona glandis, vel tarso palpebrarum, subiisse cernitur.

Utrum



Utrum quidam cutis affectus, et nonnullae concretiones super eandem formatae, a pilorum bulbis, vel a sebaceis glandulis exoriantur, determinare saepenumero non leve negotium. Idoneus igitur hic est locus adnotare, acrem materiam, five ab uno five ab altero fonte derivetur, exsudari, unde pars irritatur, inflammatur, aliquando exco-riatur: Quod ubi fit, crassa simul exsudatur materies, quae coalescit, ac quodammodo favi speciem prae sese fert. Achor, ejusque species Crusta Lactea vocata, hujus exemplum luculentum nobis suppeditare videntur.

Acrimoniae species, quae hisce in casibus deprehenditur, contagiosa dici potest: Cum enim parvam tantummodo corporis superficiem adorta est, pauxillum acris hujus materiei in partem sanam delatum, affectum haud dissimilem progenerabit; ficque rationem reddere nos penes est, cur morbus hicc, a parte in qua sua habuerit incunabula, postea tam late sese diffundat. In parte forsitan prius affecta, ab interna solummodo causa,

causa, ortum ducit; posteaque, in reliqua cute, acrimonia ad illam extrinsecus applicata, sese ostendit. De copia hujus acrimoniae in corporis penetralibus, ex morbi externa diffusionem, judicium non semper trahendum est.

Quandam tamen acrimoniam, intus existentem, cum istis exsudationibus ad foras erumpendum proclivem esse, non solum ex eis, quae de scorbuto supra adnotata fuerint, sed etiam ex eo, quod hunc sibi exitum eligere saepe animadvertatur Labes Syphilitica, concludimus. Validius hujusce documentum vix habere possumus, quam quod lues venerea, saepe in corporis superficie, quam saepissime in capillitii marginibus, se manifestat, ibique formam exsudationum concrementum, favo simillimum, induit; quod etiam in Achoribus evenit.

Supereft ut aliquid dicamus de cutaneis morbis ab effusione ex fontibus praeter naturam ortis, ut in variis erosionibus ulceribusque videre est. Varias illorum formas delineare non possumus; igitur, ad eos, qui  
de

de eis tractaverint, autores, lectorem relegendus necesse est.

Duo alia subjicere operae pretium erit.

Primo, Te fugere nequit, acrimoniae fontes, qui vel secundum vel praeter naturam existunt, per saepe commisceri, et affectus exinde oriundos vario modo inter sese conjungi. Saepe maximo cum emolumento quisnam sit affectus primarius inquiri potest. Caeterum hujuscemodi quaestiones explicatu difficillimas esse omnes bene norunt.

Secundo, Magnam ulcerum partem nihil aliud praeter affectum prorsus localem esse, et generalem acrimoniam, hic, aequè immerito ac in pluribus aliorum morborum cutaneorum exemplis, incusari. Quam parum hoc a vero distet, experientia quotidiana satis clare demonstrat. Si enim generalibus remediis hosce morbos depellere aggredieris, spes tibi saepe fallentur: Contra vero, medicamentis parti affectae admotis, eos brevi sanabis.



## R A T I O   M E D E N D I.

Cum pathologia hujusce argumenti tenebris tantis tamque spissis involuta sit, consilia curandi, ex toto absoluta, et speciei unicuique particulari prorsus accommodata, in medium proferri posse haudquaquam sperandum; igitur pauculas tantum observationes generales, quas non inutiles fore speremus, tradere aggrediemur.

Primum, Cum multi affectus cutanei omnino topici sint, curationem eorum, per remedia systema universum afficientia, tentare, operam tantum perdere foret. Vires aegrotantium, catharticis saepius reiteratis, aliisque remediis generalibus, cum topica solum necessaria sunt, et sola proficere possunt, convellere, non tantum supervacaneum, sed aliquando nocivum. Hujus exemplum, uti mihi videtur, in Psora satis luculentum habemus: Hic morbus enim sulphure et mercurio extrinsecus admotis facile sanatur; prius vero interne datum, in morbum nihil omnino

nino potest; et posterior, interne sumptus, in morbum tardius, quam externe applicatus, agit. Usus acidi vitriolici internus, hoc in morbo, nuper laudatus fuit; quaenam vero illius sit virtus et efficacia, experientia nondum satis plane perspicueque demonstravit.

Secundum, Nonnulli e morbis cutaneis non solum topici sunt, sed etiam in affectibus, quos in melius mutare nesciamus, consistunt. Sola igitur curandi ratio est, partem morbidam delere, et defectum per aliquid sanius et integrius naturae supplendum relinquere. Res ita sese in Tinea habere conjicimus, cui, bulbis capillorum vitiatis radicitus evellendis, non medicamentis, succurritur.

Tertium, Cum vitia cutanea ab acrimonia massae sanguineae communis pendeant, ea rarius per medicamenta alvum ducentia e corpore foras expelli potest. Morbos tamen cutaneos, alvum purgando, medici plerique tollere conati sunt. Humores in superficie corporea conspicati, acrimoniam massae sanguineae inesse, nimis frequenter et temerario sibi in animum induxerunt; et, hoc  
posito,



posito, intestina pro cloaca corporis communi perperam habuerunt, et omnem sanguinis impuritatem per eandem evacuari debere putarunt. Partem quidem acrimoniae in sanguine subsistentis per hanc, licet alijs exitus illi a natura destinatus sit, foras expelli posse, non inficias ibimus. Tota hujuscemodi acrimonia, purgationibus subinde interruptis, talia enim fere adhibentur, e corpore elici, et ea diarrhoea continua, quae hoc in propositum accommodata foret, absque multis incommodis et periculo conservari, nequit. Deault, operationem mercurii ad intestina, quo venenum syphiliticum, per sanguinem diffusum, per eadem foras expelleret, prorsus determinare conatus est; quam praxin quoque aemulatus est Douglassius chirurgus. Hic vero, licet hanc mendi rationem in scriptis suis magnopere laudaverit, in eandem tamen curandi viam, quantum mihi scire licuerit, nemo processit; quoniam est difficilis, incommoda, saepe nociva, saepe parum efficax. Igitur alvi purgationem, in morbis cutaneis tam promiscue adhi-



adhibitam, fere inutilem et supervacaneam esse ducimus; unus tamen casus est, in quo aliquid commodi exinde oriri videatur: Quandocunque enim affectus cutaneus in determinatione ad cutem phlogistica consistit, vel eadem stipatur, laxantia refrigerantia non parum levaminis secum adferre consueverunt.

Quartum, Succi scorbutici non tam frequenter, quam quidam sunt opinati, conveniunt. Saeculo superiore, per vocabulum Scorbutus, quamlibet acrimoniam sanguini inesse existimatam in genere medentes significarunt; cumque documentum acrimoniae hujuscemodi commune fuerit vitiorum cutaneorum eruptio, in his omnibus succos antiscorbuticos adhibuerunt, quos experientia in speciem particularem tantum posse demonstraverit. Hae autem opiniones hodie plerumque sunt emendatae. Vocabulum Scorbutus ad unam morbi speciem indigitandam hodie solum adhibetur, in qua succi antiscorbutici saepe profunt; utrum vero contra affectus cutaneos reliquos, a vero scorbu-

to originem sibi non deducentes, necne proficiant, admodum dubium esse videtur.

Quintum, Quænam remedia, interne sumpta, in morbis cutaneis, seu ab affectione topica, seu ab acrimonia per massam sanguineam diffusa, pendentibus, plurimum boni promittunt, ea sunt Diaphoretica. Haec, cum ad vasa superficiei corporeae determinantur, et circuitum sanguinis ibidem promoveant, ad obstructions vasculorum cutis removendas potissimum accommodari videntur; et eadem remedia, quoniam perspirationem adaugent, acrimoniam e sanguine, ante omnia alia, evacuant, cum organa perspirationis sint exitus præcipui huic consilio a natura destinati. Cum effectus hujuscemodi a diaphoreticis sperare liceat, quædam de delectu eorum habendo dicemus.

Aquæ minerales in morbis cutaneis frequenter, et non absque successu prospero, in usum sunt revocatae; et, licet e corpore, per vias urinarias, potissimum exeant, copia tamen non parva ad cutem quoque determinantur;

nantur; et igitur vim diaphoreticam habere possunt.

Aqua haud dubie, per fluiditatem suam magnam, ad vasa corporis humani minima ingredienda, et igitur ad unamquamque systematis secretionem et excretionem promovendam, accommodatur. Per vasa perspirationem et urinam excernentia, quae, prae omnibus aliis, aperta sunt, foras expellitur, et per haec acrimoniam sanguinis, quae plerumque salina est, et ab aqua aptissime solvitur, una secum e corpore eliminat. Aqua simplex igitur, in ventriculum copiose ingesta, in multis morbis cutaneis prodesse potest; sed haec ejus utilitas augeri potest, si eam materiis quibusdam, quae vasis excernentibus, ad quae deferantur, stimulum inferant, prius impregnaveris. Praesentior etiam in morbos cutaneos aqua hujusmodi reddi potest, si, per balneum calidum, ad cutem plenius determinetur. Aquae minerales affectibus systematis lymphatici probe conveniunt; et igitur scrophulae, quae illius systematis vitium est, et effectus

in



in superficie corporea suos frequenter ostendit, eluendae, potissimum accommodantur.

Ex multis stimulantibus, quae pro diaphoreticis haberi queant, pauca tantum in morbis cutaneis in auxilium vocata, vel potestate acrimoniam sanguinis evacuandi pollere existimata sunt, si ea quae, saeculo superiore labente, ob opiniones quorundam medicorum fallaces et a vero longe abludentes, Alexipharmaca audierint, excipias. Quae diaphoretica, in morbis cutaneis, hodie sola adhibentur, ea sunt guaiacum, et quaedam alia ligna et radices, quae partem fere decocti lignorum constituerunt. Quantum compluria ex hisce remediis spectat: Cum adeo a practicis hodiernis despectui habeantur, quam inutilia sint, hoc ex aliqua parte probat. Quorundam vere, quae nondum rejiciuntur, virtus aut dubia, aut non satis comperta est. Multum forsitan in nullo eorum, praeterquam in guaiaco ipso, reponi potest. Resinam hoc lignum continet, quae manifeste virtute diaphoretica praedita est, et, per aquam, uti in decocto fit,

fit, diffusa, acrimoniam eluendo, eandemque per spiracula cutis expellendo, proficere potest. Num vero aequè utilis fit, ac multi aevo superiore sibi persuaferunt, admodum incertum esse videtur.

Diaphoretica hoc potentiora sunt panaceae chemicorum, nempe, antimonium et mercurius. Antimonium, etiam crudum, facultatem pelles equinas eruptionibus foedis liberandi insignem manifestat; et igitur effectum non longe diversum in corpore humano editurum esse, non absque causa sperares: Hoc vero rarius adhuc est observatum. Modo sequente praeparatum medicamentum efficacius, corporique humano utilius, evadit. Pars ejus regulina adeo a sulphure antimonii crudi separatur, ut acida ventriculi in regulum agere possint; vel pars regulina prius cum acidis quibusdam, quam in ventriculum ingeratur, conjungitur. Haec ex antimonio praeparata contra quosdam affectus cutaneos efficacia nonnunquam fuerunt; cæterum, cuinam speciei potissimum conveniant, vel quaenam ratio eadem administrandi  
fit

fit optima, nondum compertum habemus.

Diaphoreticum magis efficax, et in auxilium morborum multo plurimum promptum, est mercurius. Hic omnia systematis vasa excernentia stimulat, et igitur humores tantopere evacuat, et obstructions resolvit. Praesertim in corpore, saltem largiter, nunquam accumulatur, quin, per cutem, copiosius foras eliminetur, et ita cum acrimonia in genere expellat, tum in obstructions cutis quamplurimum possit. Attamen, ad acrimonia tantum syphiliticam evacuandam potissimum accommodari novimus. Cuinam vero acrimoniae praeterea peculiariter conveniat, nos omnino latet. In acrimonia scorbutica plurimum nocet; in cancos et quosdam alios affectus nihil omnino potest; in scrophula de utilitate ejus multum ambigitur. Mercurius igitur haud remedium est universum; cuinam vero morbo cutaneo potissimum accommodetur, aliis quaerendum et statuendum relinquo.

Haec



Haec paucula, de vitiis cutaneis curandis, protulisse sufficiat. Per totum hocce opusculum, cum species morborum cutaneorum, tum remedia eorundem, investigationem quam accuratissimam requirere demonstrare voluimus. Felices ! si quid ad hancce provehendam et illustrandam contulerimus ; sin minus, in magnis tamen voluisse, nec ignominiae nec dedecori est.

Si quid in hacce dissertatiuncula attentione legentis non prorsus indignum occurrat, id Culleno celeberrimo, qui nobis in hoc argumento obscurissimo exequendo occupatis facem solus praetulerit, omnino referendum esse, lubentissimi confitemur.

Quinetiam gratiae illi, ob alia beneficia fere innumera in nosmet collata, meritissimae debentur ; sed ne ea, quae animus gratus sentiat, perpetuoque senserit, dictis non exaequemus, incepto tam difficili ex toto abstinere decrevimus.

F I N I S.

## E R R A T A.

- P. 5. l. 23. *pro* docet, *lege*, docent.  
P. 10. l. 17. *pro* ultro, *lege*, temere.  
P. 11. l. 16. *pro* cutis, *lege*, cutem.  
P. 12. l. 14. *pro* affectibus, *lege*, affectibus.  
P. 13. l. 18. *pro* effectibus, *lege*, effectibus.  
P. 14. l. 4. *pro* quod cutaneos, *lege*, quod inter cutaneos.  
P. 14. l. 9. *pro* distinxerimus, *lege*, distinguemus.  
P. 15. l. ult. *pro* conduceret, *lege*, deduceret.  
P. 16. l. 21. *pro* sponte natura, *lege*, sponte naturae.  
P. 19. l. 9. *pro* cutanei effectus, *lege*, cutanei affectus.  
P. 23. l. 14. *pro* deformant, *lege*, deforment.